

歷代職官表

冊二

皇代圖書集成

卷

三

欽定歷代職官表卷三

內閣中

歷代建置中 隋至宋

隋

〔隋書百官志〕三公參議國之大事依後齊置府無其人則闕尚書省事無不總置令左右僕射各一人總吏部禮部兵部都官度支工部等六曹事是為八座門下省納言二人給事黃門侍郎四人錄事通事令史各六人內史省置監令各一人尋廢監置令二人侍郎四人舍人八人通事舍人十六人主書十人錄事四人

〔杜佑通典〕隋有內史納言即中書令侍中是為宰相亦有他官參預焉柳述為兵部尚

書參掌機事又楊素為右僕射與高穎專掌朝政

〔徐堅初學記〕中書令隋室諱中依周官改為內史煬帝改為內書令侍

中隋文帝改為納言置二人煬帝改為侍內給事黃門侍郎煬帝去給事

之名直曰黃門侍郎用人益重裴矩裴蘊為之皆知政事

謹案隋代雖置三公以官高不除其秉國鈞者惟內史納言而尚書令

事無不統即不預機事亦稱政本之地故唐沿其制以三省為宰相之

職也至如柳述以尚書參掌機事楊素以僕射掌朝政裴矩裴蘊以黃

門侍郎知政事則皆以他官而兼宰相之任其即唐同平章事之所由

內昉歟

唐

〔舊唐書職官志〕唐初因隋號武德三年三月改納言為侍中內史為中

書令內書省為中書省龍朔二年二月甲子改尚書省為中臺僕射為匡

政左右丞為肅機中書門下為東西臺侍中為左相黃門侍郎為東臺侍

郎中書令為右相侍郎為西臺侍郎廢尚書令咸亨元年十二月詔龍朔

二年新改尚書省百司及僕射已下官名並依舊光宅元年九月改尚書

省為文昌臺左右僕射為文昌左右相門下省為鸞臺中書省為鳳閣侍

中爲納言中書令爲內史垂拱元年改黃門侍郎爲鸞臺侍郎神龍元年二月臺閣官名並依永淳已前故事

〔冊府元龜〕先天二年十二月改元開元改中書爲紫微門下爲黃門侍

中爲監左右僕射爲左右丞相以兵部尙書同紫微黃門三品姚元崇兼

紫微令以尙書左僕射兼侍中劉幽求爲尙書左丞相兼黃門監正官名

也五年九月改紫微黃門依舊爲中書門下天寶元年二月改侍中爲左

相中書令爲右相黃門侍郎爲門下侍郎尙書左右丞相依舊爲左右僕

射至德二載左右相依舊爲侍中中書令

謹案唐初以三省之長中書令侍中尙書令爲宰相後罷尙書令不置

而左右僕射亦爲相自中葉以降他官之同平章事者獨預機務而

中書令侍中僕射遂僅存虛名然其官則仍宰相職也今故首載沿革

以明本制而官數職掌並詳列於左用備考訂焉

〔唐六典〕尙書都省尙書令一人掌總領百官儀刑端揆武德中太宗初

為秦王嘗親其職自是不復置國政樞密皆委中書左右僕射開元初改左右丞相掌總領六官紀綱百揆初亦宰相之職開元中張說兼之後罷知政猶為丞相自此之後遂不知國政

〔唐會要〕自武德至長安四年以前僕射並是正宰相故太宗謂房玄齡等曰公為宰相當須大開耳目求訪賢哲即其事也神龍初豆盧欽望為僕射不帶同中書門下三品不敢參議政事數日後始加知軍國重事韋安石除左僕射東都留守不帶同三品自後空除僕射不是宰相遂為故事

〔李肇國史補〕南省故事左右僕射上宰相皆送監察御史捧案員外奉筆殿中侍御史押門自丞郎御史中丞皆受拜而朝論以為臣下比肩事主儀注太重元和以後悉去舊儀惟乘馬入省門如故上訖宰相百僚會食都堂

〔舊唐書職官志〕門下省侍中二員掌出納帝命緝熙皇極總典吏職贊

相禮儀以和萬邦以弼庶務所謂佐天子而統大政者也凡軍國之務與中書令參而總焉坐而論之舉而行之此其大較也門下侍郎二員掌貳侍中之職凡政之弛張事之予奪皆參議焉錄事四人主事四人

〔新唐書百官志〕中書省中書令二人掌佐天子執大政而總判省事侍

郎二人掌貳令之職朝廷大政參議焉舍人六人掌侍進奏參議表章凡

詔旨制敕璽書冊命皆起草進畫既下則署行以久次者一人爲閣老判

本省雜事又一人知制誥顓進畫給食於政事堂其餘分署制勅以六員

分押尚書六曹佐宰相判案同署乃奏主書四人主事四人〔杜佑通典〕主書晉本用武

官宋改用文史齊於中書置主書令史北齊除令史字隋復加令史唐又除之

〔胡三省資治通鑑注〕政事堂在東省屬門下自中宗後徙堂於中書省

則堂在右省也案裴炎傳故事宰相於門下省議事謂之政事堂故長孫

無忌爲司空房玄齡爲僕射魏徵爲太子太師皆知門下省事至中宗時

裴炎爲中書令執政事筆故徙政事堂於中書省

〔王應麟玉海〕開元中年十一張說為相又改政事堂號中書門下列五房

於後曰吏樞機兵戶刑禮房分曹以主眾務焉

謹案唐以三省為政府故僕射侍中中書令三官其初皆宰相之任至

中書門下兩侍郎凡同平章事者必帶是職則為宰相兼銜其有不同

平章事而專為中書門下侍郎者則不過參預省事蓋如今內閣學士

之職又中書舍人所掌為詔旨制勅進畫署行殆如今內閣之讀本批

本亦與學士為相仿至今之內閣中書其官置自明初雖亦沿中書舍

人之舊稱宋趙與峕賓退錄云中書侍郎舊稱中書今轉為中書舍人之稱案今內閣中書之單稱中書其源蓋出於此其實

乃唐宋三省掾屬非復舍人之職矣

〔通典〕唐侍中中書令是真宰相尚書左右僕射亦嘗為宰相其間或改

其名其本即侍中中書令也共有四員其餘以他官參掌者無定員但加

其僕射貞觀末加平章事方為宰相同中書門下三品貞觀十七年以兵部尚書李勣同中書門下三品同中

夫守侍中崔知温為正議大夫守中書令劉齊賢為中大夫守侍中並同

中書門下三品案此當以階卑官高令所給祿同三品耳當時權宜之制



其後亦有階卑官高爲侍  
中中書令者卽更不言  
及平章事知政事參知機務參與政事及平章

軍國重事之名者並爲宰相亦漢行丞相事之例也自先天之前其員頗  
多景龍中至十餘人開元以來常以二人爲限或多則三人天寶十五年  
之後天下多難勳賢並建故備位者衆然其秉鈞持衡亦一二人而已

謹案同三品之名杜佑謂起於李勣而永樂大典引唐職林又謂長孫  
無忌爲太子太師同中書門下三品同三品自此始與通典不合考之  
於史無忌以貞觀二十二年檢校中書令知尙書門下三省事並未嘗  
同三品蓋職林之誤也

〔新唐書百官志〕唐因隋制以三省之長中書令侍中尙書令共議國政  
此宰相之職也其後以太宗嘗爲尙書令臣下避不敢居其職由是僕射  
爲尙書省長官與侍中中書令號爲宰相其品位旣崇不欲輕以授人故  
嘗以他官居宰相職而假以他名自太宗時杜淹以吏部尙書參議朝政  
魏徵以祕書監參預朝政其後或曰參議得失參知政事之類其名非一

皆宰相職也貞觀八年僕射李靖以疾辭位詔疾小瘳三兩日一至中書門下平章事而平章事之名蓋起於此其後李勣以太子詹事同中書門下三品謂同侍中中書令也而同三品之名蓋起於此然二名不專用而他官居職者猶假他名如故自高宗以後爲宰相者必加同中書門下三品雖品高者亦然惟三公三師中書令則否其後改易官名而張文瓘以東臺侍郎同東西臺三品同三品入銜自文瓘始永淳元年以黃門侍郎郭待舉兵部侍郎岑長倩等同中書門下平章事平章事入銜自待舉等始自是終唐之世不能改宰相事無不統故不以一職名官自開元以後常以領他職實欲重其事而反輕宰相之體故時方用兵則爲節度使時崇儒學則爲大學士時急財用則爲鹽鐵轉運使又其甚則爲延資庫使至於國史太清宮之類其名頗多皆不足取法故不著其詳

〔曾鞏隆平集〕唐故事左右僕射各一人侍中中書令各二人爲正宰相李勣任左僕射以南省務疏於北省始命帶同中書門下三品並同平章

事者爲真宰相其左右僕射不帶同三品者但釐尙書省務而已又有知政事參議朝政參預朝政參知政事參知機務皆宰相之稱也高宗謂參知政事崔知溫曰郭待舉岑長倩郭正一魏元同歷任尙皆淺且令預聞政事未可與卿等同名待舉等並與中書門下同受進止平章事則是平章事亦或居參知政事之下其後方鎮遂有以恩授平章事者然而宰相謂之平章事蓋始於唐矣

〔新唐書宰相表〕唐因隋舊以三省長官爲宰相而又以他官參議而稱號不一出於臨時最後乃有同品平章之名然其爲職業則一也

謹案唐自肅宗至德以後其爲宰相者必曰同中書門下平章事終唐之世不復改易而至德以前未有定名稱號不一至爲繁冗馬端臨所謂唐代宰相名尤不正者是也今以新唐書宰相表考之前後多至四十餘名其中惟尙書令納言內史令中書令左相右相尙書左右僕射侍中同中書門下三品爲宰相正官謹臚具於表用昭一代之制他如

鳳閣鸞臺紫微黃門卽中書門下之改名其曰兼曰判曰守曰檢校者亦權攝之辭不爲定典今俱不列於表至其隨時暫置者有曰知政事曰參預朝政曰參議朝政曰知門下省事曰朝章國典參議得失曰參知政事曰專典機密曰平章政事曰同掌機務曰參知機務曰參掌機密曰參謀政事曰同知軍國政事曰兼知政事曰平章軍國重事曰參知機務曰軍國重事宣共平章雖皆宰相之任而大抵爲一人而設並非官號今亦略之云

〔宋敏求春明退朝錄〕唐制宰相四人首相爲太清宮使次三相皆帶館職弘文館大學士監修國史集賢殿大學士以此爲次序

謹案唐代宰相皆兼館職故當時官制弘文館於門下省集賢殿書院史館祕書省俱隸於中書省也我

朝初置內國史內祕書內弘文三院以翰林官隸之蓋亦參仿唐制而設後復改內閣另置翰林院而大學士多兼翰林院掌院學士之職今

文淵閣領閣事亦以大學士充之館閣鴻規允符前典至內閣侍讀學士侍讀等官皆內三院未改時所置故其職銜悉視詞館然考其所掌實卽前代中書省官屬非文學侍從者可比今故以唐弘文集賢史館祕書諸官沿革仍入翰林院表內焉

〔洪邁容齋隨筆〕侍中中書令爲兩省長官自唐以來居真宰相之位而中書令在侍中上肅宗以後始以處大將故郭子儀僕固懷恩朱泚李晟韓宏皆爲之其在京則入政事堂然不與國事懿僖昭之時員寢多率由平章事遷兼侍中繼兼中書令又遷守中書令三省均稱使相皆大勅繫銜而下書使字五代尤多

〔春明退朝錄〕唐宰相奉朝請卽退廷英止論政事大體其進擬差除但入熟狀畫可今所存有開元宰相奏請狀二卷鄭畋鳳池稿草內載兩爲相奏擬狀數卷祕府有擬狀注制十卷多用四六皆宰相自草五代亦然

〔龐元英文昌雜錄〕禮部王員外因問唐宰相宿直否余言唐制宰相每

日一人宿直開元二年姚崇爲紫微令崇年位已高時亦違其直次所由吏數持直簿詣之崇題其簿曰告直令史遣去又來必欲取人有同司命老人年事終不擬當諸官歡笑不復逼以直十一年停宰相宿直見會要此其證也

五季

〔五代會要〕晉天福四年八月勅皇國革故庶政維新宜設規程以謝公共其中書知印祇委上位宰臣一員五年三月升中書門下平章事爲正二品門下中書侍郎爲清望正三品其翰林學士院公事並歸中書舍人謹案五季承唐舊制以同中書門下平章事爲宰相其宰臣名姓具見於冊府元龜資治通鑑而五代新舊二史俱載漏闕儀文典制已無可考見今節採會要一條以著其略至後梁設崇政院使參謀議於禁中爲專掌機密之官蓋亦宰相之事以其官制與唐宋樞密院相承今故不入於內閣表內又唐莊宗建行臺於魏州嘗設左右丞相明宗長

興四年以馮贛父名璋不欲斥其家諱改同平章爲同中書門下二品  
此皆一時偶置之名無關定則今亦不列於表云

宋

〔宋史職官志〕宰相之職佐天子總百官平庶政事無不統宋承唐制以  
同平章爲真相之任無常員有二人則分日知印以丞郎以上至三師爲  
之其上相爲昭文館大學士監修國史其次爲集賢殿大學士或置三相  
則昭文集賢二學士併監修國史各除唐朝以來三大館皆宰臣兼故仍  
其制國初范質昭文學士王溥監修國史魏文浦集賢學士此爲三相例  
也

〔春明退朝錄〕本朝置二相昭文修史首相領焉集賢次相領焉三館惟  
修史有職事而頗以昭文爲重自次相遷首相乃得之趙令初拜止獨相  
領集賢殿大學士續兼修國史久之方遷昭文館薛文惠與沈恭惠並相  
薛自參政領監修拜相仍舊而沈領集賢畢文簡與寇忠愍並相而畢領

監修寇領集賢王太尉獨相亦止領集賢近時王章惠龐莊敏初拜及獨相悉兼昭文修史二職非舊制也

〔馬端臨文獻通考〕參知政事掌副宰相毗大政參庶務其除授不宣制不押班不知印不預奏事不升政事堂勅尾署銜降宰相一等

〔王闢之澠水燕談〕國初趙普爲相朝廷欲用薛居正呂餘慶同政而不欲令與普齊難其名號詔問陶穀曰唐有參知政事知機務下宰相一等故以命居正等參知政事然不押班不知印案唐以裴寂爲僕射參知政事郭待舉以資淺於中書門下同承受進止平章事然則平章下於參政穀乃以爲參政下宰相一等失之遠矣其後因循不改迨官制更革始罷

〔江少虞宋朝事實類苑〕開寶六年勅參知政事薛居正呂餘慶於都堂與宰臣趙普同議公事是月又勅中書門下押班知印及祠祭行香今後宜令宰臣趙普與參知政事薛居正呂餘慶輪知旣而復有釐革雍熙四年文德殿前始置參政甄位在宰相之後至道中寇萊公爲參知政事復



與宰臣輪日知印正衙押班其甄位遂與中書門下一班書勅齊列銜街衢並馬宰相使相上事并有公事並升都堂及萊公罷遂詔只令宰臣押班知印參政止得輪祠祭行香正衙甄位次宰臣之下立凡有公事並與宰臣同升都堂如宰臣使相上事卽不得升

〔隆平集〕宋興以平章事爲宰相以參知政事樞密使副知院同知院簽書院事並爲執政官

謹案宋自元豐以前皆仍唐制以平章事爲真宰相而又別設參知政事稱執政官以爲宰相之副蓋其職如今之協辦大學士惟今協辦以尙書充之部務乃其本任故六曹奏事仍依尙書班次不爲內閣正員視宋制稍異云

〔宋史職官志〕神宗新官制於三省置侍中中書令尙書令以官高不除人而以尙書令之貳左右僕射爲宰相左僕射兼門下侍郎以行侍中之職右僕射兼中書侍郎以行中書令之職廢參知政事置門下中書二侍